

Ilinniartut ineqarfii pillugit Inatsisartut inatsisaata allanngortinneranik Inatsisartut inatsisissaattut siunnersuut

(Meeqqanut, Inuusuttunut, Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)

Saqqummiussissut (saqqummiussissut nutaaq)**Siullermeerneqarnera**

Ilinniartut ineqarfii pillugit Inatsisartut Inatsisaata allanngortinneqarnissaanik Inatsisartut inatsisissaattut siunnersuut matumuuna Naalakkersuisut sinnerlugit saqqummiuppara.

Ilinniartunut pissutsit pitsanngorsarnissaat Naalakkersuisut anguniartuarpaat.

Siunnersuut arlalinnik siunertaqarpoq.

Siullertut siunertaa tassaavoq ilinniartuq ilinniarnep nalaani toquppat aappaasoq inooqataasorluunniit qitornaqassappatalu meeqqat qimataasut inissiamik allamik nassaarnissamut piffissaqartinnissaat qulakkiissallugu.

Ilinniartut ineqarfiini najugaqartumut attartuinnermik isumaqatigiisummik Naalakkersuisut atorunnaarsitsinissaat pillugu piumasaqaammut saneqqussisinnaaneq siunnersuummi aamma siunertarineqarpoq, maanna ilinniartut ineqarfiini najugaqartoq ilinniarnep naammassinninnerup kingorna kingusinnerpaamik ullunnaat qulit qaangiutsinnagit ilinniartunut inissiamiit anisariaqarsimassasoq piumasaqaataammat. Ilinniarnep naammassinerata kinguninngua ilinniartunut inissiaqarunnaarnertik pissutigalugu soraarummeerluni naammassinninnermi ilinniartup peqataasinnaanera allannguinissamut siunnersuutip qulakkiissavaa.

Siunnersuummi aamma erseqqissarniarneqarpoq, ilinniartuq ilinniarnep atattillugu suliffimmiikkallarpat imaluunniit aturfimmiikkallarpat, ilinniartullu ilinniarnep atattillugu suliffimmiikkallarnerani imaluunniit aturfimmiikkallarnerani inoqutigiit tamarmik peqataappata, ilinniartunut inissiaq Naalakkersuisunut atugassanngortinneqassasoq.

Tamatuma saniatigut paasineqarpoq, ilinniartut ineqarfii pillugit inatsisip kalaallisoortaani oqaatsitigut tulluanngitsoqartoq. Tassani pineqarput allannginerit oqaatsini marlunni assigiimmik oqaasertaqarnissaanik siunniussaqartut. Siunnersuummi taamaallaat kalaallisoortaani oqaatsitigut allannguisoqartitsiniarpoq, inatsisillu danskisuuani allannguisoqarnani.

Taamatut oqaaseqarlunga siunnersuut Inatsisartunut oqallisigisassanngorlugu ingerlateqqippara.